

پطرس نجات جہ زندان خودا فرشته کومک امرأ

۱۲

۱ هو وختان، هیرودیس پادشاه اذیت و آزار و شکنجهی مسیحیان شروع بوکوده. ۲ اون فرمان بده یوحنا برار، یعقوب کی ایتا جہ دوازده تا رسول بو، شمشیر امرأ بوکوشید. ۳ وختی بیده کی آکار، یهودیان خوشحال کوده، ایام عید فصیح میانی پطرس دسگیر بوکودیدی. ۴ هیرودیس بعد پطرس گیفتن، اون تاوده زندان دورون و چهار دستهی چهار نفری نگهبان بنه تا اون بیاید و تصمیم داشتی کی بعد عید فصیح، تومامی مردوم ورجه اون محاکمه بوکونه. ۵ پس پطرس زندان میان بدآشتیدی ولی ایمانداران تومام قوت امرأ اون ره دوعا کودیدی.

۶ ای شب قبل او روز کی هیرودیس تصمیم داشتی پطرس محاکمه بوکونه، اون به دوتا زنجیر دوسته و بین دوتا سرباز نگهبان بوخوفته و نگهبانانم زندان در جلو نگهبانی دیدی. ۷ ایدفعهیی خوداوند فرشته آشکار بوسته و نوری زندان میان بتابسته. فرشته پطرس پهلوی بزه و اون خواب جا ویریزانه، بوگفته: «فوری ویریز!» هو وخت زنجیرانم اون دسان جا بکفتیدی زمین سر. ۸ فرشته اون بوگفته: «تی کمر دود و تی کفش دوکون.» پطرس هو کار بوکوده. فرشته اون بوگفته: «تی ردای دوکون و می دونبالسر بیا.» ۹ بزین پطرس اون دونبالسر زندان جا بیرون بوشو. اون باور نوکودی او کاری کی فرشته انجام دتن دره واقعی یه، بلکی فکر کودی رویا دتن دره. ۱۰ اوشان جہ اولی و دوومی نگهبانان چومان جلو بوشویدی و فارسه ییدی

دروازهی آهنی کی رو به شهر واژ بوستی. دروازه خوره خوره اوشان جُلو واژ بوسته. پس بوشویدی بیرون تا آخر کوچه فارسهیدی و فرشته ناخبر ایدفعهیی غیب بوسته.

۱۱ او وخت پطرس به خودش بَمو خو امرأ بوگفته: «هسه دِ یقین دَارم کی خوداوند خو فرشتهی اوسه کوده کی مرّجّه هیروودیس دس و اونچی کی قوم یهود اینتظار داشتیدی، نجات بده.» ۱۲ وختی بفهمسته، بوشو مریّم خانہ کی یوحنا مار بو، هو یوحنایی کی اون «مرّقس» هم دوخوایدی. خیلی یان بَمو بید اویہ کی دوعا بوکونید. ۱۳ وختی پطرس درّ بزه، دوختری کی رودا نام داشتی و اویہ خدمتکار بو بَمو کی درّ واکونه. ۱۴ هو وخت کی پطرس صدای بشناخته، جّه خوشحالی هولّ کوده و درّ وآنکوده، بوشو اطاق دورون و اوشان بوگفته کی: «پطرس درّ سر ایسه!» ۱۵ اوشان، اون بوگفتید: «مگه تی عقل جّه دس بدیی؟» ولی وختی بیدهیدی اون تأکید کونه، بوگفتیدی: «شاید اون فرشتهی محافظ ایسه کی بَمو.»

۱۶ پطرس هَطو در زئنّ ادامه دیی. وختی درّ واکودیدی، پطرس بیدهیدی و همه تان تعجب بوکودید. ۱۷ ولی پطرس خو دس امرأ اشاره بوکوده کی ساکت بید و اوشان ره تعریف بوکوده کی چوطویی خوداوند اون زندان جّا نجات بده. بزین بوگفته: «یعقوب و ایمانداران دیگرم خبر بدید». بزین جّه اوشان پهلو بوشو جای دیگر.

۱۸ فردا صبح ره، نگهبانان دیلّ زاله ترکستن دبوو، چونکی نانسیدی پطرس سر چی بَمو. ۱۹ هیروودیس دستور بده همه جا پطرس دونبال بگردید و چون اون

نیافتیدی نگهبانانِ جا بازجویی بوکوده، بزین فرمان بده اوشان بوکشید. بزین
هیرو دیس جه یهودیه به قیصریه بوشو و مدتی اویه بیسه.